



Cussegl da vischnaunca 20-2013/2016
Seduta dils 27 da mars 2015

Protocol

dalla seduta dil cussegl da vischnaunca,
venderdis, ils **27 da mars 2015**, allas 20¹⁵- 20⁴⁵
en casa communal

Presidi: Edgar Durschei

Actuar: Ervin Maissen

Presents:

- | | | |
|-----------------------------|---|--|
| a) Cussegl | Christoph Berger
Armin Berther
Adrian Bigliel
Silvio Candinas
Edgar Durschei
Wendelin Jacomet
Jordana Lozza-Desax | Armin Manetsch
Flavio Murer
Adrian Pally
Alfred Spescha
Rico Tuor
Livio Zanetti |
| b) Suprastonza
communala | Francestg Cajacob
Madlen Deflorin-Spescha | Cecilia Maissen-Desax
Iso Mazzetta |
| c) Perstgisas | Rita Huonder-Tenner | Roger Tuor |
| d) Hosps | 4 personas | |

“Sco gia vegniu fatg allusiun a caschun dalla davosa seduta dil cussegl da vischnaunca eis ei giavischau che tuts ils commembers dalla suprastanza seigien presents allas radunozas dil cussegl. Jeu supplicheschel da respectar quei giavisch egl avegnir.

2.5% dividenda survegnan ils acziunaris dalla ORA/KVR. Ier ha giu liug la radunozza generala a Glion. Ils cuosts per las vischnauncas acziunarias han priu tier per 7% da 2,636 milliuns sin 2,821 milliuns.

192 skiunzs han priu part alla Trofea Péz Ault. Quei ei in niev record. Per menar atras la cuorsa dil campinadi svizzer ha ei basignau 80 gidonters. A cusseglier Armin Berther ed a tuts gidonters in grond engraziament per lur nunstunclenteivel engaschament.

160 delegadas e delegai dallas uniuns d’acordeon dalla Svizra ein seradunai la dumengia vargada a Mustér. Denter auter ein els vegni orientai da concusseglier e president dil comite d’organisaziun Flavio Murer davart la 17’avla fiasta federala d’acordeon da l’auter onn cheu a Mustér. Era a cusseglier Flavio Murer e ses gidonters in grond engraziament.

381 meters aulta e 380 milliuns francs cara duei la tuor a Val s. Pieder daventar. Mo ina sgnocca da marketing ni realitad?

La Claustra ha cumpletau la direcziun cun la specialista da comunicaziun e marketing Nina Hug.

L’Academia Vivian ha surdau in mandat d’administraziun al Center sursilvan d’agricultura. Leu ei vegniu scaffiu per 6 meins ina piazza da praticum en pensum parzial per metter en pei ideas e dar slontsch all’academia ed al center d’agricultura.

Ils 4 d’avrel suentermiezdi ha liug in’informaziun cun ils proprietaris da secundas habitaziuns. Jeu sperel che tuttas cusseglieras e cussegliers hagian era survegniu l’invitaziun e seigien presents quella sera.

Ina candidatura per il cussegl da vischnaunca ei vegnida inoltrada entochen ussa da Pablo Maissen. Tochen ils 31 da mars han 15 votantAs aunc la pusseivladad da far ulteriuras propostas.

Ella Tuatschina han ins saviu leger interessantas caussas davart la davosa seduta dil cussegl da vischnaunca Tujetsch, cunzun era sur da collaboraziuns e fusiuns.

Dapi la davosa seduta dil cussegl da vischnaunca han ils suandonts vischins bandunau il terrester. Cun in bien patratg lein nus seregurdar da:

Christgina Bigliel-Berther da Cons naschida ils 15 da december 1929, morta ils 8 da mars 2015; Giusep Schwarz da Funs/Clavaniev naschius ils 17 da november 1937, morts ils 11 da mars 2015; Emmanuel Caminada da Latis, naschius ils 3 da fevrer 1921, morts ils 19 da mars 2015 e Maria “Gada” Lechmann-Deragisch da Raveras, naschida 5 da fevrer 1918, morta 26 da mars 2015.

Els ruaussien en pasch.

Fetg grond plascher hai jeu d’astgar comunicar dapi la davosa seduta 4 naschientschas :

Martim Oliveira Santos, naschius ils 26 da fevrer 2015, fegl da Maria de Fatima Santos e Paulo Moreira dos Santos; Annalina Maissen, naschida ils 28 da fevrer 2015, feglia da Melanie e Gion Duri Maissen-Dermon e beadia da geraua Cecilia Maissen; Linard Berther, naschius ils 19 da mars 2015, fegl da David Berther e Toja Maissen-Berther e Mila Lorena Candinas, naschida ils 22 da mars 2015, feglia da cusseglier Silvio Candinas e sia consorta Barbara.

Cordiala gratulaziun als loschs geniturs."

Tractandas:

1. Protocol nr. 19 - 2013/2016
2. Via Sogn Gions: Credit (messadi nr. 24-2013/2016)
3. Elecziun complementara dalla cumissiun da baghegiar
4. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



Cussegl da vischnaunca 20-2013/2016
Seduta dils 27 da mars 2015

1. Protocol nr. 19 - 2013/2016

President dil cussegl da vischnaunca

Il protocol ei vegnius tarmess tier per posiziun. Enteifer ils 5 dis fixai ei vegniu inoltrau treis objecziuns. Il protocol purificau ei vegnius tarmess tier al cussegl da vischnaunca ils 25 da mars 2015.

Il protocol nr. 19-2013/2016 dalla seduta dils 27 da fevrer 2015 vegn approbaus senza midadas.

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



2. Via Sogn Gions: Credit (messadi nr. 24-2013/2016)

Suprastonza communal

En num dalla suprastonza communal presenta gerau Iso Mazzetta la fatschenta. La sanaziun dalla Via Sogn Gions ei s'entardada plirs onns. Primarmein han ins vuliu spitgar giu l'engrondaziun dalla casa da tgira. Silsuenter ha ei dau retardaments en connex cun la procedura da contribuziun.

En connex cun la fixaziun dall'interessenza publica ha ei dau ina discussiun davart la differenziaziun denter l'avertura generala e l'avertura detagliada. La dertgira ha susteniu la posiziun dalla vischnaunca. Fussen las ponderaziuns dalla suprastonza communal vegnidas messas sil tgau, havess quei era giu grevas consequenzas finanzialas per la vischnaunca.

Las cefras indicadas el messadi ein vegnidas scalpridas tenor objects. La cumpart da frs. 18'000.-- vid la canalisaziun d'aua schubra cumprida els cuosts dalla via ei la cumpart ch'ei colligiada directamein cul tgierp dalla via e ch'ei necessaria per menar naven las auas dalla via.

Concernent ils cuosts dalla canalisaziun exista ina discrepanza denter la damonda da credit ed il preventiv resp. il plan da finanzas. Fertion ch'il plan da finanzas sebase sin cefras indicativas, sebasan ils cuosts indicai el messadi sin in project e las offertas che derivan dalla procedura da submissiun.

Cun frs. 20'000.-- han ins risguardau ina cumpart dalla contribuziun d'incunvegnientscha pil diever dalla Via Sogn Gions e dalla Via Cons dalla MGB (anteriura Viafier Furca-Alpsu) en connex cun la construcziun dil tunnel dalla viafier.

Ellas ponderaziuns finalas ha la suprastonza communal numnau ils motifs che plaidan encunter spustar il termin per la sanaziun dalla Via Sogn Gions. Vegness il termin spustaus, s'entardass la sanaziun dalla via, la quala ei pli che urgenta, aunc inagada. El cass dalla surbaghegiada a Sut Gliendas vegn ins segir buca a saver impedir tut il traffic da baghegiar sin la Via Sogn Gions. Denton ei il traffic cun camiuns sin ina via sanada cun ina buna fundaziun segir megliers per las lingias el tgierp dalla via ch'ina via ch'ei buca sanada. Ulteriuramein vegn ins en connex cun la surbaghegiada a far pretensiuns concernent il plazzal da baghegiar, cunzun pertuccont las lavurs da scavament ed ils transports grevs, aschia che quels han da succeder da surengiu (Via Sontga Gada).

Discussiun davart la debatta d'entrada

Il cussegl da vischnaunca desista da menar ina discussiun generala davart quella fatschenta, aschia ch'igl ei decidiu d'entrar e tractar la fatschenta.

Discussiun en detagl

Cussegl da vischnaunca

Il messadi ei vegnius formulaus detagliadamein e dat ina buna survesta davart las cefras. Era ein las damondas gia vegnidas rispundidas en connex la presentaziun dalla fatschenta. Necessary ei che las objecziuns tenor las ponderaziuns finalas dil messadi concernent igl access duront il temps da baghegiar dalla surbaghegiada a Sut Gliendas vegnien observadas e ch'il traffic vegni dirigiur sur la Via Sontga Gada sil plazzal da baghegiar.

Eis ei vegniu tratg en consideraziun igl access cun vehichels resp. camiuns dils pumpiers cun ina ladezia da 2.50 m? La Via Sogn Gions ei en differents loghens relativamein stretga.

Tenor las indicaziuns a caschun dalla davosa seduta dil cussegl eis ei da quintar che la surfatscha che stat a disposiziun en dretg da baghegiar per la surbaghegiada Sut Gliendas hagi da pagar approximativamein frs. 48'000.--. Ei quella summa debitada dalla vischnaunca ni dils investurs? Separticipeschan ils possessurs da lingias sco Swisscom, Repower ni Recal vid ils cuosts dalla via?

Suprastonza communal

Igl ei buca previu da slargar la Via Sogn Gions enviers la situaziun actuala. Per part ei quei buca pusseivel, perquei ch'ils baghetgs agl ur dalla via impedeschan quei. Da l'otra vart porscha il mir che vegn buca spazzaus ina qualitat pil maletg dil vitg e garantescha da l'otra vart che la via survegn buca in mument il character d'ina via da transit. Ina ladezia da 2.50 m sa denton vegnir observada.

Aschinavon ch'il terren a Sut Gliendas vegn affitau endretg da construcziun, vegnan ils investurs da separticipar vid ils cuosts da perimeter. Resta il terren en proprietad dalla vischnaunca, vegn la vischnaunca a stuer pagar la contribuziun cumpleina.

La lingia dil scaldament lontan dalla Recal traversa sulettamein sin l'altezia dalla Casa da tgira Sursassiala la via. Sper la canalisaziun finanziada ordeifer ils cuosts suttamess alla via ein las lingias d'aua, dalla Swisscom e dalla Repower tangadas. Ils possessurs da quellas lingias ston financiar sezs lur cumpart dils cuosts.

Decisiun

Cun 13 encunter 0 vuschs e neginas abstenziuns decida il cussegl da vischnaunca:

- Da conceder in credit da frs. 380'000.-- per la cumpart communal vid la sanaziun dalla Via Sogn Gions e la construcziun dalla canalisaziun d'aua schubra ed il remplazzament dalla canalisaziun d'aua tschuffa;*
- da suttametter quei conclus el senn d'art. 21, lit. c dalla constituziun communal al referendum facultativ.*

Cussegl da vischnaunca Dissentis/Mustér
Il president: Igl actuar:

Edgar Durschei

Ervin Maissen



3. Elecziun complementara dalla cumissiun da baghegiar

President dil cussegl da vischnaunca

Cun la demissiun sco cusseglier da vischnaunca ha Marco Schmed era abdicau sco commember dalla cumissiun da baghegiar. Tenor regulativ da fatschentas elegia il cussegl da vischnaunca ils commembers dalla cumissiun da baghegiar.

Per l'elecziun complementara ella cumissiun da baghegiar proponan la suprastanza communal ed il biro dil cussegl Ronny Zanin, nasch. 1976. Ronny Zanin ei da professiun scrinari e dispona dallas habilitads professiunalas per far part dalla cumissiun da baghegiar. Aschinavon ch'ei vegn buca fatg ulteriuras propostas, sa l'elecziun succeder cun maun pli.

Ei vegn desistiu da proponer in'elecziun a scret.

Decisiun

Cun 13 encunter 0 vuschs e neginas abstenziuns elegia il cussegl da vischnaunca Ronny Zanin sco commember dalla cumissiun da baghegiar pil rest dalla perioda d'uffeci 2013/2016.

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



Cussegl da vischnaunca 20-2013/2016
Seduta dils 27 da mars 2015

4. Ura da damondas (conform ad art. 44 dil regulativ da fatschentas)

Supprastonza communal

Igl ei vegniu inoltrau neginas damondas a scret.

Ils 27 da matg 2015 vegnan las vischnauncas da Sursassiala ad orientar la populaziun davart il studi en connex cun la realisaziun d'in tunnel denter Tujetsch e Caschinutta. L'occurrenza ei previda ella sala Peter Kaiser dalla claustra. La sala dispona dil spazi necessari per tschentar suppias sco era pender si plans e cartas.

Il president communal animescha cusseglieras e cussegliers da separticipar stediamein alla sentupada dils 4 d'avrel 2015 cun ils proprietaris da habitaziuns secundaras.

Ils 6 da matg 2015 vegn la populaziun sur 60 onns envidada da prender part ad in'occurrenza en connex cun l'occupaziun da persunas attempadas.

President dil cussegl da vischnaunca

La proxima seduta dil cussegl da vischnaunca ha liug prevedentamein venderdis, ils 24 d'avrel 2015.

Plinavon fa il president menziun d'entginas occurrenzas che han liug il proxim temps a Mustér.

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen

Disentis/Mustér, ils 9 d'avrel 2015

G:\Uffeci baghegiar\Cussegl da vischnaunca\Cussegl da vischnaunca 2013_16\Protocols\Cus0016_20.docx